

N monumënt en onur de Merch Dapunt

Le Consëi de formaziun de Kortsch (comun de Solaneres / Schlanders) inviëia ala festa de benedisciun dl anteriöl de recort al jonn badiot, stlopeté dl 1944 a Kortsch por ne avëi nia olghé al ordin da jì sot pro i Todësc

Merch Dapunt ê nasciü dl 1923 a Sotrú de Badia, fora de na familia de bëgn önesc mituns. Le pere Maria (1883 – 1941) s'â maridé dui iadi, ê la pröma fomena Tarina Vittur (1887 – 1918) da San Ciascian morta n ann do che l'ultima fia ê gnüda al monn. Cun ëra âl albü trëi mituns, Angel, Maria y Epifania. Cun la secunda fomena Anna Pedevilla (1899 – 1932) da Rina, che foss spo ince la uma de Merch, nen âl ciamó albü ot, Siegfried, Otto, Merch, Vijo, Guido, Emma, Ida y Tarejia.

La familia Dapunt, da chëra che Merch gnô, viô dl laur da paur. Le lüch da Sotrú ê inlaota n lüch mesan, olache al gnô zidlé dantadöt vaces por le lat y la cern, mo ince de pici tiers, sciöche bisces o cioures y sambëgn porcí y iarines. Le terac che ê da lauré ite ne é nia le plü bel, la maiú bert taca söl rogn ért sura le lüch. Le Anví sö. Sce i vijins dla familia Dapunt laorâ un da carigá y l'ater da tescere, se conzentrâ le patrún Dapunt sön le laur da paur.

Merch ê nasciü tl plü bel dl tēmp fascist. Sciöche te döt le Südtirol, insciö êl ince te Badia proibí da porté inant le lingaz y les usanzas ladines. La scora ê deplēgn taliana y ince te dlijia gnôl ma adoré le lingaz talian. Tan che i mituns stentass da surantó le lingaz forest vëigon dales trëi lètres che Merch á scrit püch denant co morí, te chères che la ortografia y la gramatica taliana ne vëgn nia dagnora respetades.

Canche la popolaziun dl Südtirol gnô dl 1939 metüda dan dala gran domanda sce resté a ciasa o s'un jí ne savô tröc nia ci che ai â da fá. De un n vers se sintîi tacá al monn che ai â conesciü dan la Pröma Vera dl Monn, chël ó dí a chël monn che ti conzedô da vire fora les usanzas y les tröziuns tirolejes, dl ater vers s'un stöi indô saurí olache ai ê y ne orô nia lascé döt cant por s'un jí dalunc da ciasa. La familia de Merch, adöm cun le pere Mariangel, aldî pro chës families che se sintî liades a süa tera y che ne orô porchël nia arbandoné ci che sü antenac ti â lascé. Chësta é bunamēter ince stada la rajun ciodiche ai â tut la dezijiun da sté olache ai ê y da ne dé nia jö la cherta por se trasferí ti Paisc Todësc. Ai ne orô gnanca se sposté jö por la Talia, ne se sintîi pö gnanca liá o capis da chë popolaziun.

La Vera n'â degun sēns...

Canche al rumpî fora la Secunda Vera dl Monn dl 1939 â Merch sēdesc agn. Al ê trö' massa jonn por gní c... dé sot les ermes, al ne â nia ciamó fat le soldá y ne savô bunamēter gnanca sciöche an ess tigní na erma tles mans. Mo i agn passâ y Merch gnô tres plü gran, insciö che al gnô ince por êl le momēnt da jí a trá zetoles. Dl 1941, l'ann che so pere morí complîl i dejedot agn, le momēnt olache an metô man da insigné jö ince i jogn de chësta eté por i mené spo sön le front. Che Merch ais albü döt de atri pinsiers te chël momēnt él por nos incö saurí da capí. An l'ess adoré a ciasa, olache al ê pö da lauré inant sön le lüch. Sü fredesc plü vedli ê tramidui gnüs cherdá te vera, le fre plü vedl da cin agn incá prou y porchël ince dalunc da ciasa. Lascé sües sorus dassores

cun i fredesc plü pici a lauré ite la campagna ne ti ará nia plajü plü co intant, se arál pö bonamënter ince sintí responsabl por ëi. Porvia che la familia de Merch n'â nia opté forapert é le jonn gnü cherdé da jí pro i soldas talians. Cina la capitolaziun dl esert talian dl 1943 vëgn Merch mené sön le confin cun la Iugoslavia, püch dalunc da Triest. Canche al toma le fascism s'un vëgn le jonn da Sotró indô a ciasa y tol la dezijiun da resté iló a daidé lauré ite le lüch, mo d'isté dl 1944 ciafel la comunicaziun che al mëss indô jí sot, en chësc iade cun l'esert todësch. Sü geniturs ê intratan tramidui morc, insciö che an l'ess dassënn adoré a ciasa, mo Merch messâ ma stimé y se lascé mené a Solaneres, olache an l'â inserí. Canche al ess messü dé jö le ioramënt al Führer ai 10 de messé dl 1944 s'un él sciampé adöm cun so compaejan Vijo Alfreider da Antermëia, tla speranza che i Paisc Todësc ess tosc pordü la vera. Merch y Vijo é rová cina te Puster, plü avisa a Valdaura, olache ai á damané na paura sce ara ti ess dé valch da mangé mo impede ti porté n toch de pan éra jüda a cherdé i rapresentanc dla SOD, che fajô inlaota le sorvisc de control. Merch y so compagn vëgn sön chëra piá y mená impröma a Balsan, olache ai vëgn despartis: Vijo vëgn metü sön la ferata che l'ess mené tl ciamp de konzentramënt da Dachau da chël che al ne gnará mai plü derevers, deperpo che Merch vëgn indó condüt te süa caserma a Solaneres, olache al ti vëgn fat le prozes ai 31 de messé dl 1944.

Stlopeté sciöche »ejëmpl da nia fá do«

Merch Dapunt é gnü stlopeté ai 29 de agost dl 1944 dales sis da doman te n pre a Kortsch tla Venusta (comun de Solaneres / Schlanders).

Benedisciun cun Siur Sepl Granruaz

Indoman, sabeda ai 25 de setëmbër 2021 dales cater domisdé, gnaral benedí a Kortsch n monumënt »amonimënt« en recort a Merch Dapunt.

Le degan badiot emerit siur Sepl Granruaz cuntará fora dla biografia de Merch Dapunt, söl post sará ince na delegaziun dl Comun de Badia.

Deplü plü inant

Nosc foliet edemanal »La Usc di Ladins« portará n articul tles edemes che vëgn söla festa da Kortsch.



Merch Dapunt.